


Liketho tseo Re li Etsang



SABATHA MANTSIBOEA

Bakeng sa thuto ea Beke ena, Bala:

Ba-Ef. 1:1–4; Matt. 22:35–37; Matt. 7:24, 25; Liprov. 18:24; 1 Ba-Kor. 15:33; Moek. 2:1–11.

Temana ea Khopolo:

“Empa ha le sa rate ho sebeletsa Jehova, ikhetheleng kajeno eo le tla mo sebeletsa, leha e ka ba melimo e sebelelitsoeng ke bo-ntatá lona mose oane oa noka, kapa melimo ea ba-Amore, bao le ahileng fatšeng la bona. Ha e le ‘na le ba ntlo ea ka, re tla sebeletsa Jehova’” (Joshua 24:15).

Na u kila hlokomela hore bophelo bo tletse liqeto? Hantle-ntle, motho a ka hla re ka tsela tse ngata, seo re se etsang letšoare lohle, ho tloha nakong eo re tsohang ho fihlela re robala, ke ho etsa liqeto. Re etsa liqeto tse ngata hoo hangata re sa nahaneng le ka tsona. Re li etsa feela. Liqeto tse ling li bonolo ebile li fetoha tloaelo, ha tse ling e le tse fetolang bophelo ‘me li na le litlamorao tsa bosafeleng, e seng feela bakeng sa rona empa le bakeng sa malapa a rona. Ke kahona ho leng bohlokoa ho nahanisa liqeto tsa rona, haholo-holo tse kholo, tse ka re amang le malapa a rona bophelo bohle e seng feela ba rona empa le ba ba malapa a rona.

Ke ba bakae ba rona ba ikoahlaeang ka liqeto tseo re li entseng ho fihlela kajeno? Ke ba bakae bao le kajeno ba ntseng ba phela le ho soahlamana ho bakiloeng ke liqeto tse fosahatseng tseo ba li entseng khale koa? Lehlohonolo ke hore tšoarelo e teng. Ho teng topollo, hape ho teng pholiso, le bakeng sa liqeto tse mpe ka ho fetisisa. Bekeng ena re tla talima ka tsela e pharalletseng haholo taba ea liqeto tseo re li etsang, hore na re lokela ho li etsa joang, le hore na liqeto tsena li ka re ama joang le ba malapa a rona.

**Ithute thuto ea beke ena ho lokisetsa Sabatha sa la 13 ‘Mesa.*

Bolokolohi ba Khopolo, Bolokolohi ba Khetho

Bakreste ba bang ba lumela hore Molimo o se a khethile, le pele motho a ka tsoaloha, hore na motho eo o tla bolokeha kapa che. Ke hore, bao qetellong ba lahlehang ka ho sa feleng ba lahleha hobane Molimo, ka bohlahe ba Hae (thutomolimo ena e bolela joalo) o etselitse motho eo khetho ea hore a lahlehe. E leng se bolelang hore, ha ho le joalo, ho sa natse liqeto tsa hae, motho ea joalo o tla tsuoa. Ka lehlohonolo, re le Baleti ba Letsatsi la Bosupa, ha re ikamahanye le thuto eo. Ho e-na le hoo, re lumela hore Molimo o khethile hore bohle re bolokehe, 'me o entse seo le pele lefatše le thehoa, re khethiloe ke Eena hore re tle re be le bophelo bo sa feleng.

Bala Ba-Efese 1:1–4; Tite 1:1, 2; le 2 Timothea 1:8, 9. Litimana tsee li re bolella eng ka ho khethoa ke Molimo le hore na re khethiloe neng?

Leha litaba tsena li ka ba molemo joang, ho tla 'ne ho be le batho ba lahlehang (Matt. 25:41). 'Me ke hobane, leha Molimo o re khethile bohle, o neile batho neo e halalelang ka ho fetisisa, e leng bolokolohi ba khopolo, bolokolohi ba khetho.

Mattheu 22:35–37 e ruta eng ka bolokolohi ba khopolo?

Morena ha a re qobelle ho mo rata. Hore lerato e be lerato, le lokeloa ho fanoa ka bolokolohi. Ka litsela tse ngata, motho e mong a ka etsa khang ea hore Bibe ke pale ea Molimo a nanabelang batho ha ba batla, ntle ho qobello, hore a tle a hapele lipelo tsa bona ho Eena. Bonnete bona ba taba bo ka bonoa bosebeletsing le bophelong ba Jesu, le kamoo batho—ka ho sebelisa bolokolohi ba bona ba khopolo—ba ileng ba itšoara kateng malebana le Eena. Ba bang ba ne ba huleloa ho Eena; ha ba bang bona ba ne ba 'matla a shoele.

Feela Molimo o re khethetse pholoho, empa qetellong, re lokela ho etsa khetho ea ho amohela pholoho eo. Ha ho potang hore e 'ngoe ea liqeto tseo re lokelang ho li etsa, khetho ea ho sebeletsa Jehova, ke ea bohlokoe ka ho fetesisa ho rona le ba angoang (joalo ka lelapa la rona le haufi) ke bophelo ba rona le liqeto tseo re li etsang bophelong boo.

Ho Etsa Khetho tse Nepahetseng

Kaofela re tsebisisa hantle bohlokoa ba liqeto tseo re li etsang. Hape bohle rea tseba kamoo liqeto tse mpe li ka amang maphelo a rona le a ba bang hampe kateng. Potso ke hore, re ka tseba joang ho etsa liqeto tse nepahetseng?

Litemena tse latelang li re fa mehato e akaretsang e ka re thusang letšolong la rona la ho etsa liqeto tse nepahetseng. Ke e fe mehato eo?

1.1 Ba-Thes. 5:17, Jakobo 1:5

2. Esa. 1:19, Matt. 7:24, 25

3. Ps. 119:105, 2 Tim.3:16

4. Liprov. 3:5, 6; Esa. 58:11

5. Liprov. 15:22, 24:6

Qetong e 'ngoe le e 'ngoe e bohlokoa eo re e etsang, ho bohlokoa ha ka kang hore re ee ho Morena ka thapelo, hore re etse bonnete ba hore khetho ea rona ha e re robise molao oa Molimo ka tsela e fe kapa e fe, leha e le likomelo tsa Hae. Ho bohlokoa ha ka kang hore re tšepe Molimo, hore re nehele khetho ea rona ho Eena; ke hore, re lokela ho rapella hore liqeto tseo re li etsang li mo tlotlise le hore re ikemisitse ho lesa liqeto tsa rona haeba li ea khahlanong le morero oa Hae ka bophelo ba rona. Makhetho a mangata, hape, baeletsi ba bohlale ba ka thusa haholo ha re batla ho etsa liqeto. Qetellong, re ka ba le tiisetso e kholo re tseba hoba Molimo o rata le ho batla se molemo ka ho fetisisa bakeng sa rona, le hore haeba ka tumelo le ka boikokobetso re nehela maphelo a rona ho Eena, re ka tsoela pele ka tumelo liqetong tseo re li etsang.

U etsa liqeto tse kholo joang bophelong ba hau? Ke mehato e fe ea semoea, haeba e le teng, eo u e nkang ha u batla ho etsa liqeto tsee?

Ho Khetha Metsoalle

E 'ngoe ea likhetho tsa bohlokoahali tseo re li etsang ke metsoalle ea rona. Hangata ha re tsoe letšolo ho ea batla metsoalle; hangata setsoalle se iketsahalla ka tlhaho ha re qeta nako le batho ba natefeloang ke lintho tse tšoanang le tsa rona.

Ke litšiea li fe tsa ho khetha metsoalle tseo re li fumanang litemaneng tse latelang?
Liprov. 12:26; 17:17; 18:24; 22:24, 25.

Liproverbia 18:24 se re haeba re batla ho ba le metsoalle re lokela ho ba le setsoalle. Ka nako e 'ngoe batho ba iphumana ba le boinotšing, empa katamelo ea bona e bolutu e seng mofuthu ke eona e lelekang ba bang. “Le ba tsoang pele hará rona ba na le libopeho tse sa rateheng; ‘me ha re khetha metsoalle re lokela ho khetha ba sa tlo re furalla ha ba fumana hore ha rea phetheha. Ho hlokeha ho mamellana. Re lokela ho ratana le ho hlomphana ho sa natse likoli tse totobetseng; hobane ona ke Moea oa Kreste. Boikokobetso le ho hloka boitšepi li lokela ho hlaoleloa, le bonolo bo nang le mamello mabapi le liphoso tsa ba bang. Sena se tla timetsa boikhantšo se re etsa ba lipelo li jeoang ba fanang.”—Ellen G. White, *Pastoral Ministry*, leq. 95.

E 'ngoe ea pale tse tsoang pele tsa setsoalle tse kileng tsa tsejoa ke ea setsoalle se lipakeng tsa Davida le Jonathane. Hoja Saule, morena oa pele oa Israele le ntatá Jonathane, o ile a tšepahala ‘me a ba le kutlo, ‘muso oa hae o ka be u nkile meloko e mengata, ‘me Jonathane e ka be e bile mohlhlami boreneng ba hae. Ha Saule a itlhabisa a sa lokeloa ke pitso ea hae, Molimo oa khetha Davida ho ba morena e mocha oa Israele, kahona a etsa hore Jonathane a se tšoanelehe ho seo ka nepo e neng e lokela ho ba sa hae. Mona re na le mohlala o matla oa kamoo liqeto tse fosahetseng tsa setho se seng sa lelapa (Saule) li ammeng setho se seng se sele sa lelapa (Jonathane). Empa Jonathane o ne a sa halefela kapa hona ho monela Davida. Ho e-na le hoo, o ile a khetha ho thusa Davida ka ho mo sireletsa bohaleng ba ntatáe, Saule. “Pelo ea Jonathane ea holehana le ea Davida, ‘me Jonathane a mo rata, joalo ka ha a ithata” (1 Sam. 18:1). Ke mohlala o matla ha ka kang oa setsoalle sa ‘nete.

“Le se ke la lahleha, ‘litloaelo tse mpe li bolisa mekhoe e metle” (1 Ba-Kor. 15:33). Boiphihlelo ba hau le metsoalle e bile bo fe, le ba ne ba sa u rerela bobefeela ba qetella ba u etse hampe leha ho le joalo? Khetho e mpe ea metsoalle e ka senya likamano tsa lelapa joang?

Ho Khetha Molekane oa Bophelo

Haeba u lokela ho khetha metsoalle ea hau ka hloko, u lokela ho ba hlokolosi le ho feta ha u khetha molekane oa hau oa kamoso. Adama o ne a hlohonolofetse haholo ka hore Molimo o ile a mo etsetsa molekane ka matsoho a Hae 'me e le ea ntšitsoeng ho eena. Khetho ea Adama e bile bonolo hobane Eva e ne e se mosali ea teng feela empa e ne e le mosali ea phethehileng. Ha e le rona bohle re na le nako e batlang e le thata ho feta, hobane ha ho le ea mong oa rona ea phethehileng hape re na le batho ba bangata bao re lokelang ho khetha ho bona. Hobane khetho ena e bohlokoa haholo, Molimo ha oa re siea re se na tataiso ntlheng ena ea bophelo ba rona. Kathoko ho mehato eo re ileng ra e talima thutong ea Mantaha, ho na le mehato e meng e khethollohileng eo re lokelang ho e latela tabeng ea lenyalo (re tla talima taba ea lenyalo ka hloko e fetisang thutong ea 6). Efela, kathoko ho khetho ea ho sebeletsa Morena, taba ea molekane e tla lula e le khetho ea bohlokoa ka ho fetisisa e ka etsoang ke mang kapa mang bophelong ba hae.

Ke tataiso e fe e akaretsang e fumanehang litemaneng tse latelang e ka sebelisoang 'me e flamehang ho sebelisoa ke ea batlang molekane ea lokileng bakeng sa lenyalo? Ps. 37:27, 119:97, 1 Ba-Kor. 15:33, Jakobo 1:23–25.

Kathoko ho ho batla motho ea nepahetseng bakeng sa lenyalo, e ba motho ea nepahetseng pele. “ ‘Me joale, ntho tsohle tseo le ratang hore batho ba le etse tsona, ba etseng tsona le lona; hobane ke oona Molao le Baporofeta’ ”(Matt. 7:12). Motho e mong a ka fumana eo e ka bang molekane ea nang le makhabane ohle ao motho a ka a batlang, empa haeba eo ea batlang makhabane ho e mong eena ha a na oona, ho tla ba le mathata.

Taba ena ha e ncha, 'me ha e bonoe lenyalong feela empa le bophelong ka kakaretso. Paulose o qeta nako e ngata qalong ea buka ea Ba-Roma a bua le ba ahlolang ba bang ka hore ba etsa lintho tseo, bona bao ba ahlolang, ba leng molato oa tsona. Kapa, joalo ka ha Jesu a ile a bolela: “‘U talimela'ng lehlokoa le leihlong la ngoanénó, athe ha u lemohe tšiea e ka leihlong la hau?’ ” (Matt. 7:3).

Ke hangata ha kae o lakatsang e ka ba bang (mohlomong molekane oa hau) ba ka be ba na le libopeho tseo, hantle, uena u se nang tsona? A kú e nahane.

Ho Khetha Thuto

Ka nako e 'ngoe, re lokela ho etsa khetho ea hore na re batla ho etsang ka bophelo ba rona mabapi le mosebetsi kapa seo u tla qeta bophelo ba hau o se sebetsa. Ntle ho hore motho e be ke morui a ikemetseng kapa a sebetse nako eohle hae a hlokomela ntlo le lelapa (mosebetsi o khabane ka ho fetisisa), batho ba bangata ba lokela ho khetha tsela eo ka eona ba tla iphelisa. Ehlile, bohle re phela maemong ao, ka boemo bo itseng, a re sehelang meeli mabapi le mesebetsi. Empa boemong bo fe kapa bo fe boo re phelang ho bona, re ka etsa khetho ea mesebetsi ea rona eo, haholo moeelong oa ho tseba hobane re na le pholoho ho Jesu Kreste, e ka fa maphelo a rona moelelo le sepheo ka keketseho. Ka bokhutšoanyane, re ka etsa seo tlotlisong ea Molimo.

Salemone o ile a etsa phoso e fe, 'me ke joang re ka bang hlokolosi ho se etse phoso e tšoanang? Moek. 2:1–11.

Ha re hloke ho ba barui hore re tšoaesehe lerabeng le tšoanang le la Salemone. “Hobane lerato la leruo ke motso oa libe tsohle, ba bang ka ho le lakatsa ba khelohile tumelo, ‘me ba itlhabile ka mahlomola a mangata” (1 Tim. 6:10). Motho e mong e ka ba mofutsana feela a rata chelete ka tsela e tšoanang feela le ea ea ruileng. E, re hloka ho iphelisa, ‘me ho sa natse na re etsa’ng kapa re etsa bokae, ha rea lokela ho etsa ho batla leruo molingoana. Malapa a mangata, le oona, a bile le tšotleho ea ho ba le ntate ea tletsoeng ke ho etsa chelete hoo a nyahlalitseng lelapa molemong oa ho rua. Ke bana, kapa balekane ba bakae ba neng ba ka thabela bophelo bo bonolo ho fetisa ho e-na le kamano e fokotseng le ntatá bona? Maemong a mangata, batho ba ka thabela ha pele ho feta ha morao. Ho tloha Thholehong, ebile leano la Molimo hore mosebetsi e be karolo ea bophelo (Gen. 2:15). Kotsi ke ha re etsa mosebetsi oa rona khubu ea bophelo ba rona, kapa o fetoha tsela e le 'ngoe feela ea ho iphumanela leruo. Ke eona phoso eo Salemone a ileng a e etsa. O ne a batla moelelo liporojekeng tseo, leha tse ngata tsa tsona li ile tsa mo tlišetsa khotsofalo ho fihlela boemong bo itseng, qetellong o ile a fumana hore ha li na moelelo.

Motho e mong o kile a re: “Ke batho ba bakae bao qetellong ea maphelo a bona, lakalitseng hore e ke ba ka be ba qetile nako e ngata ofising ho e-na le lelapa la bona? Molaetsa oa bohlokoa ke o fe polelong ee?”

Khopolo e Eketsehileng:

Bala Ellen G. White, “Boithuto ba buka tsa Daniele le Tšenolo,” pp. 112–119, in *Testimonies to Ministers and Gospel Workers*. “Tšenolo e ile ea fanoa e le tataiso le matšeliso a kereke nakong eohle ea Bokreste. . . . tšenolo ke ntho e senotsoeng. Morena ka sebele o senoletse ho mohlanka oa hae liphiri tse teng bukeng ena, 'me o rerile hore li buleloe boithuto ba bohle. Linnete tsa teng li lebisitsoe ho ba phelang matsatsing a ho qetella a nalane ea lefatše, 'moho le bao ba phetseng matsatsing a Johanne. Tse ling tsa liketsahalo tse bontšitsoeng boporofeteng bona li se li fetile, tse ling li ntse li phethala ha joale; tse ling li tliša ponong ea rōna ho koaloa ha khohlano e kholo e lipakeng tsa matla a lefifi le khosana ea leholimo, 'me tse ling li senola tlhlo le thabo ea ba lopolotsoeng lefatšeng le lecha. “Ha ho se be le ea mong ea nahanang hore, ka ha ba sitoa ho hlalosa se boleloang ke letšoao ka leng bukeng ea Tšenolo, ha ho na molemo oa ho batla bukeng ena ea Tšenolo molemong oa ho batla se boleloang ke linnete tse fumanoang teng. Eena Eo Ea senotseng liphiri tsee ho Johanne, o tla fana ho ea batlang ka tiieo 'nete, tatso ea leholimo. Bao lipelo tsa bona li buleileng ho amohela 'nete ba tla thusoa ho utloisisa linnete tsa eona, 'me ba tla fuoa lehlohonolo le tšepisitsoeng ba utloang mantsoe a boporofeta bona, le ho boloka tse ngoliloeng teng.” — Ellen G. White, *The Acts of the Apostles*, pp. 583–585.

Lipotso tsa Puisano:

1. Ke qeto li fe tseo u li entseng ka bolokolohi kajeno? Li u bolella eng ka uena le kamano ea hau le Molimo le ba bang? Liqetong tseo u li entseng, ke li feng, haeba li teng, tseo u lakatsang hore e ka u ka be u li entse ka tsela e fapaneng?
2. Ke batho ba fe ba Bibeleng ba ileng ba etsa khetho tse fosahetseng, 'me re ka ithuta'ng liphosong tsa bona? Khetho tsa bona tse fosahetseng li ile tsa ama malapa a bona hampe joang?
3. Ha ho potso: bohle re na le boikoahlao ka khetho tse fosahetseng tseo re li entseng. Hobaneng, nakong eo ea boikoahlao boo, evangeli e leng litaba tse molemo? Ke litšepiso li fe tsa Bible tseo u iphumanetseng tsona nakong tsa mahlomola le molato oa khetho tse fosahetseng?
4. Haeba ho na le batho ba neng ba ka tla ho uena ba bua ka lenyalo, u ne u ka ba fa keletso e fe, 'me hobaneng? U ka supa litaeo li fe ho tsoa Lentsoeng la Molimo ho ba thusa ho sebetsana le qeto ee e bohlokoa?